



竹仔的故事

田庄所在，四界攏是竹仔，厝前後壁種長枝竹、刺竹，田岸邊仔嘛種規逝的竹埕(tik-luàh)，會使講竹仔佇農業時代，是重要、真濟用途的農作物，這馬我來講幾項。

先來講厝跤的竹抱(tik-phō)，長枝竹有三丈懸，共大厝圍起來，會當閘風，嘛有保護厝宅的用途。啊刺竹規身攏是竹刺，無人敢出入，有防止土匪攻家(kong-ka)的用途。因為現時較無土匪，所以刺竹就較無路用，阮厝跤的刺竹佇我囡仔時代就共剷掉矣。

啊田岸中的竹埕，當做風圍，有閘風的路用，嘛有做田園界線的用途。幾十年前，田庄的竹埕滿四界，青芊芊(tshenn-phiàng-phiàng)的竹仔，共稻田畫做一格一格，是真嬌的景緻。可惜這馬農地重畫，真濟竹埕攏攏掉(lu-tiāu)。無攏的嘛園咧拋荒，賭幾櫟老竹仔遐守田園，也無青翠、也無整齊，予田庄失去一項天然美景。

游錫堃做宜蘭縣長的時陣，有看著竹埕衰微的情景，就鼓勵宜蘭的作田人重新種竹埕，抑是共枯焦(koo-tâ)的竹埕閣照顧予青翠、予整齊。彼當陣有舉辦比賽，嘛有獎金補助，效果按怎我毋知，干焦知現時宜蘭田裡有種真濟豪華的農舍。

竹仔會顧田園、顧厝宅，伊嘛會當做濟濟的厝內家私，親像講竹籃仔、竹椅仔、竹櫥仔等等。有一句古早話講『晴耕雨讀』，毋過我的記持是作穡人好天作田，落雨天做竹仔家私。

幾年前我去岡山的籃籬會(nâ-khah-huē)鬥鬧熱，看著下港的牛擔是用一節大竹雕起來(tiau--khí-lâi)的，這恰頂港用兩櫟柴鬥起來的大不相同(tâi-put-siong-tong)。我心適興(sim-sik-hìng)買大、中、小三枝轉來，縛規揸吊佇壁頂看嬌。啥人知厝內著賊偷，這揸竹仔牛擔煞也提去，予我毋甘搖搖(m̄-kam-tiuh-tiuh)，看來後擺愛將牛擔吊佇刺竹跤才會使得。

作者：邱文錫

☆詞彙學習☆

【竹埕】tik-luàh：狹長的竹林

【竹抱】tik-phō：密集的竹櫟

【攻家】kong-ka：侵入民宅搶劫

【青芊芊】tshenn-phiàng-phiàng：綠油油

【枯焦】koo-tâ：枯萎

【籃籬會】nâ-khah-huē：岡山的籬框會

【雕起來】tiau--khí-lâi：硬彎成

【心適興】sim-sik-hìng：一時興起